

Թեմա 5. ՖՐԵՉԵՐԱՅԻՆ ՀԱՍՏՈՑՆԵՐ:

ՖՐԵՉՆԵՐ

էջ

5.1. Ֆրեզերային հաստոցների տեսակները..... 1

5.2. Կոնստրուկցիոն և ոչ կոնստրուկցիոն, ուղղաձիգ և հորիզոնական, համապիտանի ֆրեզերային հաստոցներ..... 3

5.2.1. 6H81 մակնիշի համապիտանի ֆրեզերային հաստոց..... 3

5.2.2. 6H12ПБ մակնիշի ուղղահայաց ֆրեզերային հաստոց.... 8

5.3. Ֆրեզերման ժամանակ օգտագործվող գործիքներ..... 14

5.4. Ինքնաստուգման հարցաշար..... 233

5.1. Ֆրեզերային հաստոցների տեսակները

Այս խմբի հաստոցներում պտտական շարժումը հաղորդվում է գործիքին, իսկ մատուցման շարժումը, հիմնականում, հաստոցի սեղանին կամ բմբուկին ամրացված նախապատրաստվածքին: Ֆրեզերային հաստոցները տարաբնույթ են՝ ուղղահայաց և հորիզոնական բարձակային, անընդհատ գործողության, պատճենահան, անբարձակային ուղղահայաց, լայնահամապիտանի, երկայնակի և այլն: Սովորաբար, ֆրեզերային հաստոցների վրա հարթությունների, մակերևույթների, ակոսների և այլ աշխատանքների իրականացման նպատակով օգտագործվում են նստեցվող, ճակատային, ծայրային և այլ գործիքներ:

Ֆրեզերային խմբի հաստոցները դասակարգվում են ըստ հետևյալ մի շարք հատկանիշների:

1) *Բարձակային ուղղահայաց ֆրեզերային հաստոցներ:* Սրանք նախատեսված են լայն շրջանակով ֆրեզերային աշխատանքների համար, որոնք իրականացվում են ճակատային, ծայրային և այլ ֆրեզների միջոցով: Այդ ֆրեզներն ամրացվում են զսպախցուկային կապիչների և հարմարանքների մեջ: Մյուս հաստոցներից տարբերվում են նրանով, որ իլն ունի ուղղաձիգ

տեղակայում: Կարելի է կատարել ինչպես հանդիպական, այնպես էլ համ-
ընթաց ֆրեզերում:

2) Անընդհատ գործողության ֆրեզերման հաստոցներ:

Սրանք լինում են՝ կարուսեղա-ֆրեզերային, որոնց սեղանը նախապատ-
րաստվածքի հետ միասին պտտվում է ուղղահայաց առանցքի նկատմամբ
և թմբուկա-ֆրեզերային՝ թմբուկի հորիզոնական պտտվող առանցքով: Կի-
րառվում են սերիական և զանգվածային արտադրության պայմաններում,
ընդ որում՝ դարձակի կամ թմբուկի վրա նախապատրաստվածքի բեռնումն
ու բեռնաթափումը իրականացվում են հընթացս, առանց կանգառի: Առան-
ձին հաստոցներ բազմաիլ են:

3) Պատճենահան ֆրեզերային հաստոցներ: Սրանք լինում են համա-
պիտանի և մասնագիտացված՝ որոշակի տիպի նախապատրաստվածքնե-
րի մշակման համար: Պատճենահան համապիտանի հաստոցները հնարա-
վորություն են տալիս մշակել շտամպներ, մատրիցներ, պրես-ֆորմաներ և
այլ ուրվագծային դետալներ ու մակերևույթներ: Այս տիպի հաստոցներն
աշխատում են հատուկ կամ սովորական գործիքներով:

4) Երկայնակի ֆրեզերային հաստոցներ: Սրանք լինում են միականգ-
նակ և երկկանգնակ, միաիլ և բազմաիլ և հնարավորություն են տալիս մշա-
կել ուղղահայաց, հորիզոնական և թեք մակերևույթներ, ակոսներ՝ ամենա-
երկար և խոշոր նախապատրաստվածքների կամ մի խումբ նախապատ-
րաստվածքների վրա միաժամանակ՝ սերիական արտադրության պայ-
մաններում: Որոշ տիպի հաստոցներով կարելի է կատարել հանդիպական
և համընթաց, ինչպես նաև՝ կիսաավտոմատ ցիկլով ֆրեզերում: Ֆրեզերման
ռեժիմի լավարկված արժեքները՝ իլի պտտման հաճախականությունը,
մատուցումը, տեղակայվում են սահուն կարգավորմամբ:

5) Լայնահամապիտանի ֆրեզերային հաստոցներ: Սրանք կարող են
իրականացնել հորիզոնական, թեք և ուղղահայաց դիրքով տեղակայված,
տարբեր ձևի միջին չափերով նախապատրաստվածքների միաիլ կամ բազ-
մաիլ մշակում՝ սկավառակային, ճակատային և հավաքածու ֆրեզներով:
Կիրառվում են հատային և սերիական արտադրության մեջ:

*6) Բարձակային (կոնսոլային) հորիզոնական ֆրեզերային հաստոց-
ներ:* Սրանք մյուսներից տարբերվում են բարձակով և հորիզոնական տե-
ղադրությամբ իլով: Տարբեր նյութերից նախապատրաստվածքների վրա
հարթությունների և ձևավոր մակերևույթների մշակումն իրականացվում է
զլանական, անկյունային և ձևավոր ֆրեզներով: Կարող են օգտագործվել

նաև ճակատային և ծայրային ֆրեզներ: Այս համապիտանի հաստոցները տարբերվում են նրանով, որ հաստոցի սեղանն ուղղահայաց առանցքի շուրջ կարող է պտտվել մինչև 45° անկյամբ, ինչը հնարավորություն է տալիս նախապատրաստվածքի վրա մշակել պտտտակային ակոսներ՝ օգտագործելով բաժանարար գլխիկ:

7) *Տարբեր հաստոցներ:* Այս խմբի մեջ են մտնում մետաղամշակման այն սարքավորումները, որոնք նախատեսված են որոշակի նախապատրաստվածքների կամ որոշակի տեսակի մակերևույթների մշակման համար: Կարող են կատարել պարուրակաֆրեզերում, երիթաֆրեզերում, բազմաերիթաֆրեզերում, պտտտակային և կենտրոնահան գայլիկոցների ակոսների մշակում, երիթային և սկավառակային ֆրեզների ակոսների մշակում և այլն:

5.2. Կոնտոլային և ոչ կոնտոլային, ուղղաձիգ և հորիզոնական, համապիտանի ֆրեզերային հաստոցներ

5.2.1. 6H81 մակնիշի համապիտանի ֆրեզերային հաստոց

Հաստոցը նախատեսված է հատային և սերիական արտադրության պայմաններում ոչ մեծ չափերի նախապատրաստվածքների ֆրեզերման համար, հիմնականում՝ գլանական, սկավառակային, անկյունային, ձևավոր և մոդուլային ֆրեզների օգնությամբ: Պտտվող սեղանի առկայությունը հնարավորություն է տալիս շեղատամ անիվների պատրաստման ժամանակ, ֆրեզների, անցքալայնիչների, անցքակոկիչների և մմանատիպ դետալների վրա մշակել պտտտակային ակոսներ:


Հաստոցի հիմնական հանգույցները բերված են նկ. 5.1-ում:

Հաստոցի ղեկավարման օրգաններն են. 1 - արագությունների տուփի փոխարկման բռնակ, 2 - իլի արագափոխիչի միացման բռնակ, 3 - սեղանի երկայնակի տեղափոխման բռնակ 4 - սեղանի երկայնակի մատուցման ղեկավարման բռնակ, 5 - լայնակի մատուցման ղեկավարման բռնակ, 6 - ուղղահայաց մատուցման ղեկավարման բռնակ, 7 - ձեռքով սեղանի ուղղահայաց տեղափոխման բռնակ. 8 - ձեռքով սեղանի երկայնակի տեղափոխման դարձանիվ, 9- մատուցումների տուփի փոխարկման դարձանիվ. 10 - մատուցումների տուփի արագափոխիչի փոխարկման բռնակ:

Հարժումները հաստոցում: Ֆրեզի հետ իլի պտույտը կտրման շարժումն է : Սեղանի լայնակի, երկայնակի և ուղղահայաց համընթաց շարժումները մատուցման շարժումներն են: Սեղանի նշված բոլոր շարժում-

ները, որոնք կատարվում են ձեռքով կամ արագ ընթացքով, կոչվում են *օժանդակ շարժումներ* :

Մշխատանքի սկզբունքը: Մշակվող նախապատրաստվածքներն ամրացվում են անմիջապես սեղանի վրա տեղակայված մեքենայական մամլակների կամ հատուկ հարմարանքների մեջ: Նախապատրաստվածքի հավասար բաժանման անհրաժեշտության դեպքում օգտագործվում է համապիտանի բաժանարար գլխիկ:



Նստեցվող ֆրեզները ամրացվում են բարձակային կամ հենարանային հարմարանքներում: Պոչավոր ֆրեզներն ամրացվում են անմիջականորեն իլի կոնական անցքի կամ զսպախցուկային կապիչի մեջ:

Համապիտանի ֆրեզերային հաստոցների հիմքի վրա թողարկվում են նաև դրանց վերափոխված երկու տեսակները՝ հորիզոնական - ֆրեզերային և ուղղահայաց-ֆրեզերային հաստոցներ: Օրինակ, 6H81 հաստոցի հիմքի վրա թողարկվում է 6H81A մակնիշի լայն համապիտանի հաստոցը, որը նախատեսված է բոլոր տեսակի ֆրեզերման աշխատանքների համար: 6H11KII մակնիշի ուղղահայաց պատճենահան հաստոցը, որն ունի ծրագրային ղեկավարում, նախատեսված է կորագծային ուրվագծերի, բռնցքների, շտամպների և պրես-ֆորմաների մշակման համար:

Հաստոցի կինեմատիկան


Կտրման շարժումը: Արագությունների տուփի I լիսեռին շարժումը հաղորդվում է 5,8 կՎտ հզորությամբ Շ1 էլեկտրաշարժիչից, կիսակոշտ կցորդիչի միջոցով (նկ. 5.2): I լիսեռի վրայով տեղափոխվում է շարժական B_1 երկբլոկ անիվը: II լիսեռի վրա անշարժ ամրացված են 34, 31, 28, 24 և 38 անիվները:

III լիսեռի վրայով տեղափոխվում են B_2 և B_3 երկբլոկ անիվները: B_1 երկբլոկի դիրքից կախված՝ շարժումը $\frac{38}{24}$ կամ $\frac{24}{38}$ անիվների միջոցով հաղորդվում է II լիսեռին: B_2 և B_3 երկբլոկների դիրքերի տեղափոխմամբ, II լիսեռից, $\frac{34}{28}$ կամ $\frac{31}{31}$ անիվների միջոցով պտույտը փոխանցվում է III

լիսեռին, եթե միացված է B_3 երկբլոկը, կամ $\frac{28}{34}$ կամ $\frac{24}{38}$ անիվների միջոցով, եթե միացված է B_2 երկբլոկը: Այսպիսով III լիսեռի վրա ստացվում են 8 պտուտաթվեր: IV լիսեռի վրա նստեցված փոկանիվը շարժում է ստանում III լիսեռից՝ $\frac{20}{20}$ անիվների միջոցով, և երեք սեպածև փոկերի

միջոցով պտույտները փոխանցվում են հաստոցի իլի նկատմամբ համառանցք տեղակայված V լիսեռին: V լիսեռի հակառակ կողմում տեղակայված է 30 անիվը: M_1 բռնցքային կցորդիչի անջատման դեպքում փոխանցումը V լիսեռից $\frac{30}{64}$ անիվներով տրվում է հաստոցի VII իլին, VI

արագափոխիչ լիսեռին և $\frac{25}{69}$ անիվներին: Բարձր պտուտաթվերն իլին տրվում են անմիջապես V լիսեռից, երբ M_1 բռնցքային կցորդիչը միացված



Նկ. 5.2. 6H81 մակմիշի համապատասխան ֆրեզերային հաստոցի կրմանափիկ սխեման

է, իսկ 64 և 25 անիվները դուրս են բերված, համապատասխանաբար, 30 և 69 անիվների կառչումից: Արագափոխիչը կրկնապատկում է արագությունները՝ ապահովելով իլի՝ 1 ռոպեում տասնվեց տարբեր պտուտաթվեր:

Իլի $n_{\min}$ փոքրագույն պտուտաթվերը, հաշվի առնելով մաս փոկի առածգական սահքը, որոշվում է հետևյալ բանաձևով՝

$$n_{\min} = 1450 \cdot \frac{24}{38} \cdot \frac{24}{38} \cdot \frac{20}{20} \cdot \frac{140}{210} \cdot 0,985 \cdot \frac{30}{64} \cdot \frac{25}{69} = 64 \text{ } \mu\text{muyt}^{-1}: \quad (5.1)$$

$$n_{\max} = 1450 \cdot \frac{38}{24} \cdot \frac{34}{28} \cdot \frac{20}{20} \cdot \frac{140}{210} \cdot 0,985 = 3000 \text{ } \mu\text{muyt}^{-1}: \quad (5.2)$$

Մատուցման շարժումը: Ինչպես մատուցման, այնպես էլ արագ տեղափոխման դեպքում բարձակի մեխանիզմները պտույտները ստանում են 1,7 կՎտ հզորությամբ Շ2 էլեկտրաշարժիչից, որն անմիջականորեն կիսակոշտ կցորդիչով միացված է մատուցումների տուփի VIII լիսեռին: IX լիսեռին պտույտները փոխանցվում են B_4 բլոկով $\frac{24}{38}$ անիվների կամ $\frac{38}{24}$ անիվների միջոցով: X լիսեռը պտույտները ստանում է B_5 կամ B_6 բլոկների և ունի թվով ութ արագություններ:

X լիսեռի ծայրամասում ամրացված է լայն 18 անիվը, որը միշտ կառչման մեջ է B_7 շարժական բլոկի 37 անվի հետ: B_7 բլոկի անիվները կարող են կառչման մեջ մտնել 15 կամ 37 անիվների հետ, որոնք կոշտ ամրացված են XII լիսեռի վրա՝ ապահովելով այդ լիսեռի՝ թվով 16 տարբեր պտուտաթվեր: XII լիսեռից որդնակային $\frac{2}{36}$ փոխանցմամբ, M_0 վազանցա-

յին կցորդիչի միջոցով պտույտները փոխանցվում են XIII լիսեռին: XIII լիսեռի հակառակ ծայրին ամրացված է 22 անիվը, որը 42 և 42 անիվների միջոցով պտտում է դարձիչի տուփի կենտրոնական XIV լիսեռին: Բաժանարար 42 անիվը XIV լիսեռի հետ կապված է ապահովիչ M_n կցորդիչով և կառչվում է միաժամանակ 30 անվի հետ, որն ամրացված է XVII լիսեռին և աջ կողմի 42 և 42 անիվների հետ, որոնք ազատ նստեցված են XV և XVII լիսեռների վրա: Հեշտ է նկատել, որ ձախ կողմի 42 և 42 անիվները կպտտվեն նույն արագությամբ, ինչպես աջ կողմի 42 և 42 անիվները, սակայն՝ հակառակ ուղղությամբ: Բռնցքային M_3 կցորդիչը ծառայում է սեղանի ուղղահայաց մատուցման դարձումը կատարելու համար, որն իրականացվում է ընթացային XVI պտուտակի միջոցով, որին պտույտներ են հաղորդվում դարձիչի տուփից՝ $\frac{15}{30}$ կոնական փոխանցման միջոցով:

Բռնցքային M_3 կցորդիչը ծառայում է երկայնակի մատուցման դարձման համար:

Երկայնակի մատուցման փոքրագույն $s_{\text{երկ},\min}$ արժեքը որոշվում է.

$$s_{\text{երկ. min}} = 1420 \cdot \frac{24}{38} \cdot \frac{28}{34} \cdot \frac{18}{37} \cdot \frac{15}{37} \cdot \frac{2}{36} \cdot \frac{22}{42} \cdot \frac{42}{30} \cdot \frac{30}{33} \cdot \frac{35}{19} \cdot \frac{14}{28} \cdot \frac{19}{19} \cdot 6 = 30 \text{ մմ/րոպ}$$
(5.3)

Լայնակի մատուցման մեծագույն $s_{L, \text{max}}$ արժեքը որոշվում է.

$$s_{L, \text{max}} = 1420 \cdot \frac{38}{24} \cdot \frac{38}{24} \cdot \frac{18}{15} \cdot \frac{2}{36} \cdot \frac{22}{42} \cdot \frac{42}{30} \cdot \frac{30}{42} \cdot 6 = 750 \text{ մմ/րոպ}$$
(5.4)

Սեղանի, լայնակի սահույժի և բարձակի արագ տեղաշարժերը: Այս տեղաշարժերն իրականացվում են հաստատուն արագություններով: Այդ դեպքում էլեկտրաշարժիչից պտույտները, շրջանցելով մատուցումների տուփը, անմիջականորեն VIII լիսեռից $\frac{12}{24}$ անիվների և շփական M_2 կցորդիչի միջոցով փոխանցվում են XIII լիսեռին, այնուհետև՝ հաստոցի բանվորական օրգաններին:

Երկայնակի ուղղությամբ սեղանների արագ տեղափոխման $s_{\text{ար.}}$ արագությունները որոշվում են.

$$s_{\text{ար.}} = 1420 \cdot \frac{12}{24} \cdot \frac{22}{42} \cdot \frac{42}{30} \cdot \frac{30}{33} \cdot \frac{14}{19} \cdot \frac{19}{28} \cdot \frac{19}{19} \cdot 6 = 2610 \text{ մմ/րոպ}$$
(4.5)


5.2.2. 6H12ПБ մակնիշի ուղղահայաց ֆրեզերային հաստոց

Հաստոցը նախատեսված է գունավոր և սև մետաղներից միջին չափերի և քաշի նախապատրաստվածքների արագացված ֆրեզերման համար: Հաստոցի վրա նախապատրաստվածքների մշակումը հիմնականում իրականացվում է ճակատային, պոչավոր, մատային ֆրեզներով և ֆրեզերային գլխիկներով՝ սերիական, հատային արտադրության պայմաններում:

Հաստոցի հիմնական հանգույցները բերված են նկ. 5.3-ում:

Հաստոցի ղեկավարման օրգաններն են. 1 - անջատման կապոցների կառավարման վահանակ, 2 - իլի արագությունների փոխարկման բռնակ, 3 - սանրով սանդղակ՝ իլի պտուտաթվերի տեղակայման համար, 4 - կոճակային կայան, 5 - իլի պարկուճի սեղմման բռնակ, 6 - իլի պարկուճի տեղափոխումը ձեռքով տեղակայելու դարձանիվ, 7 - սեղանի երկայնակի մատուցումների համար ղեկավարման բռնակ, 8, 9 - ձեռքով սեղանի երկայնակի տեղափոխման դարձանիվներ, 10 - ձեռքով սեղանի լայնակի տեղափոխման դարձանիվ, 11 - ձեռքով սեղանի ուղղահայաց ուղղությամբ տեղափոխման բռնակ: 12, 15 - սեղանի լայնակի և ուղղահայաց ուղղություններով մատու-

ցումների ղեկավարման բռնակներ, 13 - մատուցումների արագության տեղակայման և փոխարկման սանր, 14 - լայնակի սահուկների սեղմման բռնակ:



Ա-կիք,
Բ-հենց,
Գ-արագությունների ստույ,
Դ-կի գլխիկ,
Ե-սանր,
Զ-լայնակի սահուկ,
Է-բարձակ,
Ը-մատուցումների ստույ:

Նկ. 5.3. 6H12 ПТБ մակնիշի ուղղահայաց ֆրեզերային հաստոցի ընդհանուր տեսքը

Շարժումները հաստոցում: Ֆրեզի հետ իլի պտույտը կտրման շարժումն է: Սեղանի լայնակի, երկայնակի և ուղղահայաց համընթաց շարժումները մատուցման շարժումներն են: Սեղանի՝ նշված բոլոր շարժումները՝ որոնք կատարվում են ձեռքով կամ արագ ընթացքով, իլի առանցքով իլի

պարկուճի ձեռքով տեղափոխությունը և իլի գլխիկի պտույտը *օժանդակ շարժումներն* են:

Աշխատանքի սկզբունքը: Խոշոր նախապատրաստվածքները սեղմիչ հարմարանքների օգնությամբ անմիջականորեն ամրացվում են հաստոցի սեղանին: Ոչ մեծ նախապատրաստվածքներն ամրացվում են մամլակների և հատուկ հարմարանքների մեջ: Ճակատային, ծայրային, մատային ֆրեզները և ֆրեզերային գլխիկները ամրացվում են իլի մեջ: Փոքրաթիվ նախապատրաստվածքների մշակման ժամանակ երկայնակի մատուցման և սեղանի արագընթաց տեղաշարժերը իրականացվում են ձեռքի միջոցով: Սերիական արտադրության մեջ հաստոցը կարելի է կարգավորել կիսավտոմատ, ճոճանակային կամ ցատկաձև ցիկլով աշխատելու համար:

Այդ նպատակով սեղանի կողային ակոսի մեջ որոշակի հաջորդականությամբ տեղակայվում են հենարաններ և բռունցքներ, որոնք անհրաժեշտ պահին ազդում են սեղանի երկայնակի մատուցման, արագընթաց տեղաշարժի և կանգառի դեկավարման աստղանվի վրա:

Կիսավտոմատ աշխատանքային ցիկլի ժամանակ հաստոցը միացնելուց հետո սեղանը նախապատրաստվածքի հետ միասին արագ տեղափոխվում է, մինչև նախապատրաստվածքի մոտեցումը ֆրեզին, որից հետո միանում է աշխատանքային մատուցումը: Մշակումն ավարտվելուց հետո սեղանը արագ ետ է վերադառնում ելակետային դիրք և ինքնաբերաբար կանգ է առնում: Բանվորը հանում է մշակված դետալը, ամրացնում նորը և նորից միացնում է հաստոցը: Ցիկլը կրկնվում է:

Ճոճանակային ցիկլով աշխատանքի դեպքում մշակվող նախապատրաստվածքները փոփոխական դիրքերով տեղակայվում են հաստոցի սեղանի աջ և ձախ կողմերում: Սեղանը կատարում է անընդհատ փակ ցիկլով շարժում՝ դեպի ձախ արագ տեղաշարժ, աշխատանքային մատուցում դեպի ձախ, դեպի աջ արագ տեղաշարժ, աշխատանքային մատուցում դեպի աջ: Մշակված դետալի հանումը և նոր նախապատրաստվածքի ամրացումն իրականացվում է սեղանի մյուս կողմում տեղադրված դետալի ֆրեզերման ընթացքում:

Ցատկաձև ցիկլն օգտագործվում է նախապատրաստվածքների հավաքածուի ֆրեզերման համար, որոնց մշակվող մակերևույթները դասավորված են միմյանցից նշանակալի հեռավորության վրա: Այդ դեպքում սեղանը

ավտոմատ ռեժիմով ստանում է մեկ արագ, մեկ դանդաղ տեղաշարժ՝ ըստ մշակվող մակերևութների գրաված դիրքի:

Հաստոցի կինեմատիկան

Կտրման շարժումը: Արագությունների տուփի I լիսեռին շարժումը հաղորդվում է 10 γ Վտ հզորությամբ Շ1 էլեկտրաշարժիչից կիսակոշտ կցորդիչի միջոցով (նկ. 5.4): II լիսեռը պտույտները ստանում է $\frac{32}{48}$ ատամնանվային փոխանցման միջոցով: II լիսեռի վրա գտնվում է B_1 եռաբլուր, որը կարող է պտույտներ փոխանցել III լիսեռին՝ երեք տարբեր արագություններով: B_2 եռաբլուր անիվը մեծացնում է IV լիսեռի հնարավոր պտտման արագությունների քանակը մինչև 9-ը: V լիսեռը պտույտները ստանում է IV լիսեռից B_2 երկբլուր անվից, որի շնորհիվ պտտման արագությունների քանակը մեծանում է մինչև 18: V լիսեռից շարժումը փոխանցվում է VII իլին, $\frac{32}{32}$ կոնական փոխանցմամբ, VI լիսեռի և $\frac{86}{58}$ անիվների միջոցով: VII իլը հավաքված է շարժական պարկուճի մեջ և կապված 58 անվի հետ: Ինչպես երևում է արագությունների գրաֆիկից, իլն ունի թվով 18 տարբեր պտտման արագություններ՝ 63-ից մինչև 3150 $\mu\text{պ/րոպ}$:


Իլի $n_{\max}$ առավելագույն պտուտաթվերը որոշվում են հետևյալ կերպ՝

$$n_{\min} = 1440 \cdot \frac{32}{48} \cdot \frac{16}{39} \cdot \frac{18}{47} \cdot \frac{19}{71} \cdot \frac{32}{32} \cdot \frac{86}{58} = 63 \text{ } \mu\text{պ/ր}^{-1}: \quad (5.6)$$

$$n_{\max} = 1440 \cdot \frac{32}{48} \cdot \frac{22}{33} \cdot \frac{39}{26} \cdot \frac{82}{38} \cdot \frac{32}{32} \cdot \frac{86}{58} = 3080 \text{ } \mu\text{պ/ր}^{-1}: \quad (5.7)$$

Մատուցման շարժումը: Մատուցման շարժումներն իրականացվում են 1,7 γ Վտ հզորությամբ Շ2 էլեկտրաշարժիչի օգնությամբ, որից պտույտները $\frac{26}{44}$ և $\frac{24}{64}$ անիվների միջոցով փոխանցվում են մատուցումների տուփին:

Մատուցումների տուփի XI լիսեռի վրա գտնվում է շարժական B_4 եռաբլուր անիվը, որը XII լիսեռին է հաղորդում երեք պտտական արագություններ: XII լիսեռից, շնորհիվ XIII լիսեռի վրա նստեցված շարժական B_5 եռաբլուր անվի, վերջինս ստանում է ինը տարբեր պտուտաթվեր: Երբ շարժական 40 անիվը տեղափոխված է աջ կողմը (ինչպես ցույց է տված սխեմայում) և կառչման մեջ է գտնվում M_1 կցորդիչի



Նկ. 5.4. 6H12ПБ մակնիշի ուղղահայաց ֆրեզերային հաստոցի կրճենատիկ սխեման

հետ, XIII լիսեռից պտույտները փոխանցվում են անմիջականորեն 40 լայն անվին: Երբ շարժական 40 անիվը տեղափոխվում է ձախ, բռնցքային M_1 կցորդիչն անջատվում է, իսկ 40 անիվը կառչման մեջ է մտնում XII լիսեռի վրա ազատ նստեցված 45, 18 երկբլուկի 18 անվի հետ: Այդ դեպքում 40 լայն

անիվը շարժման մեջ է դրվում $\frac{13}{45}$ և $\frac{18}{40}$ անիվների միջոցով:

Մատուցումների տուփի կառուցվածքի գրաֆիկը բերված է նկ. 5.4-ում:

Լայն 40 անվից M_n ապահովիչ կցորդիչի միջոցով, երբ միացված է M_2 կցորդիչը, պտույտները փոխանցվում են XIV լիսեռին: XIV լիսեռից $\frac{36}{27}$

անիվներով, XV լիսեռով, $\frac{18}{33}$ և $\frac{33}{37}$ անիվներով, XIX լիսեռով, $\frac{18}{16}$ կոնական

փոխանցմամբ, XX լիսեռով, բռնցքային M_6 կցորդիչով և XXI ընթացային պտուտակով սեղանին հաղորդվում է երկայնակի մատուցում, որի մեծագույն $s_{երկ.max}$ արժեքը որոշվում է հետևյալ արտահայտությամբ.

$$s_{երկ.max} = 1420 \cdot \frac{26}{44} \cdot \frac{24}{64} \cdot \frac{36}{18} \cdot \frac{24}{34} \cdot \frac{40}{40} \cdot \frac{36}{27} \cdot \frac{18}{37} \cdot \frac{18}{16} \cdot \frac{18}{18} \cdot 6 = 2000 \text{ մմ/րոպե:} \quad (4.8)$$

XIV լիսեռից $\frac{36}{27}$ անիվներով, XV լիսեռով, $\frac{18}{33}$ և $\frac{37}{33}$ անիվներով և

XXIII ընթացային պտուտակով, երբ միացված է M_5 կցորդիչը, սեղանին հաղորդվում է լայնակի մատուցում, որի նվազագույն արժեքը՝ $s_{լ.min}$ որոշվում է հետևյալ արտահայտությամբ.

$$s_{լ.min} = 1420 \cdot \frac{26}{44} \cdot \frac{24}{64} \cdot \frac{18}{36} \cdot \frac{18}{40} \cdot \frac{13}{45} \cdot \frac{18}{40} \cdot \frac{36}{27} \cdot \frac{18}{33} \cdot 4 = 26,5 \text{ մմ/րոպե:} \quad (5.9)$$

Ուղղահայաց ուղղությամբ մատուցումն իրագործվում է XIV լիսեռից՝ $\frac{36}{27}$ անվով, XV լիսեռով, $\frac{18}{33}$ անվով, M_4 կցորդիչով, XVI լիսեռով, $\frac{22}{33}$

անվով, XVII լիսեռով, $\frac{22}{44}$ կոնական փոխանցմամբ և XVIII ընթացային

պտուտակով: Ուղղահայաց մատուցման մեծագույն $s_{ուղղ.max}$ արժեքը որոշվում է հետևյալ արտահայտությամբ.

$$\begin{aligned} s_{ուղղ.max} &= 1420 \cdot \frac{26}{44} \cdot \frac{24}{64} \cdot \frac{36}{18} \cdot \frac{24}{34} \cdot \frac{40}{40} \times \\ &\times \frac{36}{27} \cdot \frac{18}{33} \cdot \frac{22}{33} \cdot \frac{22}{44} \cdot 6 = 645 \quad \text{մմ/րոպ:} \end{aligned} \quad (5.10)$$

XXIII լիսեռը ծառայում է դնովի կլոր սեղանին կամ բաժանարար գլխի-
կին շարժում հաղորդելու համար և միացված է XXI ընթացային լիսեռի հետ
 $\frac{30}{15}$ անիվներով:

Օժանդակ շարժումները: Սեղանի արագ տեղափոխությունը բոլոր
ուղղություններով իրականացվում է շփական M_3 կցորդիչի միացմամբ:
Շրջանցելով մատուցումների տուփը՝ պտույտները 1,7 կՎտ հզորությամբ
էլեկտրաշարժիչից տրվում են XIV լիսեռին՝ $\frac{26}{44}$, $\frac{44}{57}$, $\frac{57}{43}$ անիվների միջո-
ցով, և ապա սեղանին՝ աշխատանքային մատուցման կինեմատիկ շղթայով:

Երկայնակի ուղղությամբ սեղանի արագ տեղաշարժման արագություն-
ը որոշվում է հետևյալ արտահայտությամբ.

$$s_{\text{ար}} = 1420 \cdot \frac{26}{43} \cdot \frac{36}{27} \cdot \frac{18}{37} \cdot \frac{18}{16} \cdot \frac{18}{18} \cdot 6 = 3750 \text{ մմ/րոպ:} \quad (5.11)$$

Սեղանի, լայնակի սահուկների և բարձակի տեղափոխությունները
ձեռքով իրականացվում են, համապատասխանաբար, M_{x2} , M_{x4} և P բռնա-
կի միջոցով: Հաստոցի ղեկավարումը հարմար դարձնելու նպատակով սե-
ղանի տեղաշարժը կարելի է իրականացնել նաև M_{x3} դարձանվով, որը
միացված է XXI ընթացային լիսեռին կոնական $\frac{23}{24}$ փոխանցմամբ, բռնցքա-
յին M_7 կցորդիչի և $\frac{32}{46}$ ատամնանվային փոխանցման միջոցով

M_7 և M_6 կցորդիչները բլոկավորված են: Երբ միացված է M_7 կցորդիչը,
 M_6 կցորդիչը անջատված է, և հակառակը:

Պարկուրի հետ միասին իլի տեղակայման համար անհրաժեշտ տեղա
փոխությունը կատարվում է M_{x1} բռնակի միջոցով, որը III լիսեռով և $\frac{31}{31}$
կոնական փոխանցմամբ միացված է IX ընթացային լիսեռին: Վերջինս
շարժումը հաղորդում է պարկուրի վրա կոշտ ամրացված Γ մանեկին:

5.3. Ֆրեզերման ժամանակ օգտագործվող գործիքներ

5.3.1. Ֆրեզների նշանակությունը և նրանց տարատեսակները

Ֆրեզերումը մշակման ամենատարածված եղանակներից մեկն է: Մե-
քենաշինության մեջ օգտագործվող մետաղամշակման սարքավորումների

ընդհանուր ծավալի մոտ 20%-ը կազմում են ֆրեզերային հաստոցները, իսկ մեքենաշինության առանձին բնագավառներում դրանց կիրառությունը հասնում է մինչև 60%-ի:

Գործիքներից և ոչ մեկը չունի ձևի և նշանակության այնպիսի տարատեսակներ, ինչպես ֆրեզները: Ֆրեզի ամենամեծ առավելությունն այն է, որ հնարավոր է մշակել ձևավոր մակերևույթներ, որի համար չեն պահանջվում հատուկ, բարդ հարմարանքներ և ոչ էլ բարձր որակավորում ունեցող աշխատողներ: Ֆրեզերումը իր տեխնոլոգիական գործոններով, արտադրողականությամբ, շահավետությամբ, արժեքով և այլ ցուցանիշներով ավելի շահավետ է, քան ռանդումը, շրջատաշումը և մշակման մյուս ձևերը: Արտադրողականության տեսակետից ֆրեզերումը զիջում է միայն արտաքին ձգմանը:

Ֆրեզերումից հետո ապահովվում է նախապատրաստվածքի չափի ճշտությունը՝ 7...9 կվալիտետի սահմանում, իսկ մակերևույթի մաքրությունը՝ մինչև $R_a = 1,25$ մկմ:

Ֆրեզների դասակարգման ցուցանիշներն են.

1) Ըստ ֆրեզի առանցքի նկատմամբ ատամների դասավորության՝

- ա) գլանական՝ ատամների դասավորությունը գլանական մակերևույթի վրա,
- բ) ճակատային՝ ատամների դասավորությունը ֆրեզի առանցքին ուղղահայաց հարթության վրա,
- գ) անկյունային կամ կոնական՝ ատամների դասավորությունը կոնական մակերևույթի վրա,
- դ) ձևավոր՝ ատամների դասավորությունը ձևավոր մակերևույթի վրա (ուռուցիկ կամ գոգավոր պրոֆիլով):

2) Ըստ ատամի ուղղության՝

- ա) ուղիղ ատամներով, երբ ատամի կտրող եզրն ուղղագիծ է և ուղղահայաց է կտրման գլխավոր շարժմանը,
- բ) թեք ատամներով, երբ ատամի կտրող եզրը ուղղագիծ է և թեքված է կտրման գլխավոր շարժման նկատմամբ,
- գ) պտուտակային ատամներով, երբ ատամի կտրող եզրը պտուտակային է:

3) Ըստ ֆրեզի կառուցվածքի՝

- ա) ամբողջական, երբ ֆրեզն ամբողջապես գործիքանյութից է,
- բ) կազմածո, երբ գործիքանյութից պատրաստված ատամները ֆրեզի իրանի վրա ամրացված են մակագողման կամ սոսնձման միջոցով,

զ) հավաքովի՝ կարծր համաձուլվածքից պատրաստված թիթեղիկներով ֆրեզներ,

դ) հավաքածու, որը կազմված է մի քանի ստանդարտ կամ հատուկ ֆրեզներից և նախատեսված է մի քանի մակերևույթների՝ միաժամանակյա մշակման համար:

4) Հստ ատամի կառուցվածքի՝

ա) սրատամ ֆրեզներ,

բ) ծոծրակված ատամներով ֆրեզներ:

5) Հստ հաստոցի վրա ամրացման՝

ա) հագցնովի՝ կենտրոնական անցքով հարմարանքի վրա ամրացնելու համար,

բ) պոչավոր՝ կոնական կամ գլանական պոչամասով:

Մրատամ ֆրեզներ

Չնայած բազմազանությանը՝ թվարկված ֆրեզների տեսակները կառուցվածքային առումով շատ նմանություններ ունեն, որոնցից են. ա) ֆրեզի տրամագիծը, բ) նստեցվածքային չափերը (անցքի տրամագիծ, երիթային ակոս), գ) ատամների թիվը, դ) ատամի և ակոսի անկյունները, ե) ատամի ձևը, զ) ֆրեզի ատամի կտրող մասի անկյունները:

Ֆրեզի տրամագիծն ազդում է ինչպես ֆրեզերման գործընթացի, այնպես էլ կառուցվածքային տարրերի ընտրության վրա: Ֆրեզի տրամագիծը մեծացնելով՝ փոքրանում է կտրման հաստությունը (ավելանում է ատամների թիվը), և յուրաքանչյուր ատամի վրա ընկնող ծանրաբեռնվածությունը, լավանում է ջերմահեռացումը՝ ի հաշիվ գործիքի և նախապատրաստվածքի հպման մակերեսի մեծացման: Այս ամենը դրականորեն է ազդում մշակվող մակերևույթի որակի և գործիքի կայունության վրա:

Ֆրեզի տրամագիծը որոշելիս՝ անհրաժեշտ է հաշվի առնել, որ մեծ տրամագիծը հնարավորություն է տալիս օգտագործել մեծ տրամագծով կալակ, որի վրա ամրացվում է ֆրեզը: Այս դեպքում հարմարանքը լինում է ավելի կոշտ և ամուր, որը թույլ է տալիս ֆրեզին աշխատելու մեծ ծանրաբեռնվածությամբ: Սակայն, մեծացնելով տրամագիծը, մեծանում է նաև գործիքանյութի ծախսը և ֆրեզի արժեքը:

Գործնականում օգտագործվում է տրամագծերի միջև հետևյալ կախվածությունը.

$$D_1 = (1,6 \dots 2,5) D_w ,$$

որտեղ՝ D_1 -ը ֆրեզի ատամների հիմքում շրջանագծի տրամագիծն է,
 D_w -ն՝ անցքի տրամագիծը:


D_1 -ի անբավարար արժեքի դեպքում ֆրեզի իրանը կարող է ճաք ստանալ, հիմնականում՝ երիթային ակոսի տեղամասում:

Նստեցվող չափերից են ֆրեզի անցքի տրամագիծը, երիթային ակոսը: Մանր ատամներով ֆրեզների համար անցքի տրամագիծը վերցվում է ավելի փոքր, քան խոշոր ատամներով ֆրեզներինը: Անցքի տրամագիծն ընտրվում է՝ կախված ֆրեզի արտաքին տրամագծից, սակայն ոչ ավել 60 մմ-ից և կլորացվում մինչև ստանդարտ շարքի մոտակա արժեքը՝ 16, 22, 27, 32, 40, 50, 60 մմ: Երիթային ակոսների չափերն ընտրվում են՝ կախված անցքի տրամագծից:

Ֆրեզի ատամների քանակի ընտրությունն ազդում է կտրման գործընթացի վրա: Ատամների թիվը մեծացնելով՝ մեծանում է ֆրեզերման վրա ծախսվող աշխատանքը և անջատված ջերմության քանակը, ընդ որում՝ աշխատանքի զգալի մասը ծախսվում է տաշեղամանրման վրա, որը հանգեցնում է կայունության, հետևաբար նաև՝ կտրման արագության նվազեցման: Բազմատամ ֆրեզների վրա դժվար է ապահովել տաշեղի տեղավորման համար տաշեղային ակոսի բավարար ծավալ, ինչպես նաև նվազում է ատամի սրումների թիվը: Այս ֆրեզները հիմնականում օգտագործվում են մաքրատաշ մշակումների համար:

Ատամների թիվը կախված է ֆրեզի տրամագծից, խոռոչի և ատամի չափերից, ատամի ձևից, մշակման բնույթից: Ֆրեզի ատամների թիվը ստանդարտեցված է և կախված է նրա տրամագծից: Ատամների թիվը ընտրվում է գույգ, որպեսզի ճիշտ և հեշտությամբ կատարվի ֆրեզի տրամագծի չափումը:

Ատամի ձևի և չափերի վրա մեծ ազդեցություն ունի ատամների քանակի ընտրությունը: Փոսիկի ծավալը և պրոֆիլը, լծորդման սահունությունը և այլն պետք է ընտրվեն այնպիսին, որ կտրման գործընթացում առաջացած տաշեղը չհավաքվի և չսեղմվի տաշեղային ակոսի մեջ, այլ հեշտությամբ դուրս գա փոսիկից (ինքնուրույն կերպով կամ հովացնող հեղուկի ազդեցությամբ): Դրան նպաստում է ոչ միայն տաշեղային ակոսի ճիշտ ձևը, այլ նաև մաքրությունը, որի համար ակոսները փայլեցվում են: Գործիքի նախագծման ժամանակ մեծ ուշադրություն պետք է դարձնել այն տարրերի վրա, որոնք ազդում են տաշեղային ակոսի չափերի վրա: Դրանցից են՝ ատամի բարձրությունը և միջատամային գոգավորության շառավի-



Նկար 5.5.Սրածայր ատամների ձևը

ղը, ինչպես նաև ատամի քիկույնքի չափերը: Դրա համար փոսիկի և ատամի ձևը պետք է ապահովեն՝ ա) ատամի ամրությունը, բ) տաշեղի տեղավորման համար ամենամեծ տարածությունը, գ) լավ տաշեղագոյացումը, դ) սրումների քանակի ավելացումը, ե) ջերմամշակման ժամանակ ճաքերի բացակայությունը:

Սրատամ ատամների համար լայնորեն տարածված է առաջին ձևը՝ սեղանաձև տեսքով (նկ. 5.5ա), որը հիմնականում օգտագործվում է մաքրատաշ մշակման ֆրեզների համար: Այդ տիպի ֆրեզների սրումը կատարվում է հետին մակերևույթներով, որի հետևանքով փոքրանում է ատամի բարձրությունը, մեծանում p լայնությունը: Սրումների քիվն ավելացնելու նպատակով կարելի է մեծացնել ատամի բարձրությունը, սակայն այս դեպքում նվազում է ատամի ամրությունը: Ատամի բարձրությունը վերցվում է շրջանային քայլի ($0,5...0,65$) սահմանում: Ջերմամշակման ժամանակ միկրոճաքերից խուսափելու նպատակով ատամի հիմքը կլորացվում է $r = 0,5...2,0$ մմ շառավղով: Խոշոր ատամներով ֆրեզների համար կիրառվում են երկրորդ կամ երրորդ ձևերը (նկ. 5.5բ, գ): Ատամի բարձրությունը վերցվում է շրջանային քայլի ($0,3...0,45$) սահմանում:


Տաշեղի լավագույն տեղավորման և հեռացման համար անհրաժեշտ է կլորացման r շառավղի դրվել ամենամեծ թույլատրելի չափով:

Սակայն նրա ընտրությունը սահմանափակվում է ատամի բարձրությամբ և առջևի նիստի l երկարությամբ: Վերջինս բնութագրում է ատամի սրումների հնարավոր քանակը և ապահովում հաստատուն առջևի γ անկյուն (առանց առջևի մակերևույթի լրացուցիչ սրման): Ատամի քիկույնքի մասը՝ $R=(0,3...0,45)D_{\phi}$ շառավղով շրջանային աղեղ է (R -ը կախված է

ֆրեզի ատամների թվից): Այն ընտրվում է, ելնելով հետևյալ հանգամանքից. f լայնությամբ հետին նիստի հետ շրջանային աղեղի լծորդման դեպքում α , անկյունը պետք է $10...15^\circ$ -ով մեծ լինի հետին α անկյունից (նկ. 5.5բ): Երրորդ ատամի ձևն ստացվում է կրկնակի ֆրեզերման միջոցով (նկ. 5.5գ): Ատամի թիկունքի մասը ֆրեզերվում է $\alpha_1 = 20...30^\circ$ և α անկյունների տակ: Պատրաստման հեշտության պատճառով այդպիսի ատամները լայն տարածում են գտել:

Ֆրեզի ատամի կտրող մասի անկյունները բնութագրվում են հետևյալ անկյուններով՝ α ՝ հետին անկյուն, γ ՝ առջևի անկյուն, ϕ ՝ հատակագծի գլխավոր անկյուն, ϕ_1 ՝ հատակագծի օժանդակ անկյուն, ω ՝ կտրող եզրի թեքման անկյուն: Նշված բոլոր անկյուններն ազդում են մշակման տեխնոլոգիական պայմանների վրա:

Հետին անկյան հիմնական նպատակն այն է, որ կտրման ընթացքում ֆրեզի ատամի հետին մակերևույթը չշփվի մշակվող մակերևույթի հետ: Հետին անկյան ընտրության վրա ազդում են մշակման բնույթը և ֆրեզի օգտագործման նշանակությունը: Մանր ատամներով ֆրեզների համար հետին անկյունը վերցվում է 16° , խոշոր ատամներով ֆրեզների համար՝ 12° : Մեծ α -ի ընտրությունը ցանկալի չէ, քանի որ այն ուղղակիորեն ազդում է ատամի ամրության վրա: Այս տեսակետից կարծր համաձուլվածքով ֆրեզի ատամի հետին անկյունը խիստ կարգավորված է և ընտրվում է որոշակի սահմաններում: Որոշ տիպի ֆրեզներ ունեն մաս օժանդակ կտրող եզր, այսինքն՝



Նկար 5.6. Կտրող եզրի թեքման անկյունը

մաս հետին α_1 օժանդակ անկյուն, որն ընտրվում է $4...8^\circ$ սահմանում:

Առջևի անկյան հիմնական նպատակն այն է, որ փոքրացվի տաշելի դեֆորմացիայի վրա ծախսվող աշխատանքը: Այն ընտրվում է՝ կախված մշակվող նյութի ֆիզիկա-մեխանիկական հատկություններից, $5...20^\circ$ սահմանում, ինչպես մաս գործիքանյութի ամրության և կտրող բնութագրերից: Հատակագծի գլխավոր անկյունը որոշվում է մետաղի հանվող շերտի հաստության և լայնության հարաբերությամբ՝ կախված մատուցումից և

կտրման խորությունից: Սովորաբար ϕ անկյունն ընդունվում է 45...60°:

Կտրող եզրի թեքման ω անկյունը (նկ. 5.6) տվյալ կետում արագության V_y վեկտորի և նույն կետում կտրող եզրին տարած N նորմալի միջև կազմված անկյունն է: Այն ֆրեզին հնարավորություն է տալիս աշխատել սահուն կերպով, ինչպես նաև բարձրացնում է կտրող սեպի ամրությունը, որն արդյունավետ է, հատկապես, կարծր համաձուլվածքից պատրաստված ֆրեզների համար, որոնց ω -ի արժեքը խորհուրդ է տրվում վերցնել 12...15° սահմանում: Արագահատ պողպատից պատրաստված ճակատաշին ֆրեզների համար ω -ի արժեքը կարելի է փոքրացնել մինչև 10°:

5.3.2. Կարծր համաձուլվածքի թիթեղիկներով ֆրեզների կառուցվածքի յուրահատկությունները

Կարծր համաձուլվածքից պատրաստված ֆրեզները մեծ կիրառություն ունեն մեքենաշինության մեջ:

Դրանք ապահովում են մշակման բարձր արտադրողականություն և հնարավորություն ունեն մշակել ժամանակակից կառուցվածքային այնպիսի նյութեր, որոնք արագահատ պողպատից պատրաստված ֆրեզներով նարավոր չէ: Ըստ կառուցվածքի կարծր համաձուլվածքի ֆրեզները լինում են՝ ամբողջական, կազմածո և հավաքովի ատամներով:


Ամբողջական և կազմածո կարծր համաձուլվածքի ֆրեզները պատրաստվում են մամլման միջոցով՝ հատուկ մամլակաղապարի մեջ, կամ պլաստիկացված նախապատրաստվածքից, որից հետո կատարվում է նախնական թրծում և մշակում կտրման եղանակով:

Վերջնական թրծումից հետո ֆրեզը ենթարկվում է հղկման (հղկվում են նստեցվող բազային մակերևույթները), այնուհետև կատարվում է ֆրեզի սրումը: Ամբողջապես կարծր համաձուլվածքից պատրաստված ծայրային ֆրեզն ունի նույն հիմնական կառուցվածքային տարրերը, ինչ որ արագահատ պողպատից պատրաստված ֆրեզները: Սրանք հիմնականում փոքր չափերի են (նկ. 5.7ա):

Կազմածո կառուցվածքով զլանական ֆրեզները պատրաստվում են 20...50 մմ տրամագծով:

Ըստ կառուցվածքի լինում են՝ թագազլիսիկավոր (նկ. 5.7 բ), պրիզմաձև և պտուտակային թիթեղիկներով ֆրեզներ (նկ. 5.7գ, դ): Թագազլիսիկավոր ֆրեզները պատրաստվում են T5K10, T15K6 և այլ մակնիշների կարծր համաձուլվածքներից: Ֆրեզի համար ամրացնող մաս է ծառայում 2


հարմարանքը (նկ. 5.7բ), որի վրա նստեցվում է 1 ֆրեզը:




Նկար 5.7. Ամբողջական և կազմածո ֆրեզներ

Լավ և հուսալի ամրացման համար նստեցվող մասը պատրաստվում է կոնաձև, բացի այդ նախատեսված է նաև 3 երիթը: Պրիզմաձև և պտուտակային քիթեղիկներով ֆրեզների իրանի վրա բացված ակոսների մեջ տեղադրվում են պրիզմաձև (նկ. 5.7գ) կամ, եթե անհրաժեշտ է ստանալ երկար ֆրեզ, պտուտակային (նկ. 5.7դ) քիթեղիկներ, որոնք ամրացվում են իրանին մակագողման միջոցով:


Այս ֆրեզների սրման գործընթացը բավականին աշխատատար է, որը պայմանավորված է կարծր համաձուլվածքի վատ հղկելիությամբ: Մեքենաշինության մեջ լայն կիրառություն ունեն դնովի դանակներով (դանակների վրա մակագողման են կարծր համաձուլվածքի քիթեղիկներ)



Նկար 5.8. Դանակների մեխանիկական ամրացմամբ
հավաքովի ատամներով ֆրեզներ



Նկար 5.9. Կլոր քիթեղիկներով հավաքովի
ատամներով ֆրեզներ



Նկար 5.10.Բազմանիստ չարվող ֆիթեղիկներով
հավաքովի ատամներով ֆրեզներ

(նկ.5.8), ինչպես նաև կլոր և բազմանիստ չարվող ֆիթեղիկներով ֆրեզները (նկ. 5.9, 5.): Սրանք շահագործման տեսակետից բավականին պարզ են, ապահովում են բարձր կայունություն և գործիքանյութի խնայողություն:

Թիթեղիկները կարող են պատրաստվել, հիմնականում, կարծր համաձուլվածքներից՝ T5K10, T15K6, BK4, BK6, BK8 կամ կոմպոզիցիոն նյութերից: Վերջինս հնարավորություն է տալիս մշակել ջերմամշակված, կարծր պողպատներ (կտրման արագությունը՝ 80...120 մ/րոպ) և բուջեր (մինչև 600 մ/րոպ), ապահովելով մշակվող մակերևույթի բարձր մաքրություն:

5.4. Ինքնաստուգման հարցաշար

1. 6H81 մակնիշի համապիտանի ֆրեզերային հաստոցի հիմնական հանգույցները և ղեկավարման օրգանները:
2. Նշել գլխավոր շարժման կինեմատիկ շղթան: Ինչպես են որոշվում իլի ամենամեծ և ամենափոքր պտուտաթվերը՝ $n_{\max}$ -ը և $n_{\min}$ -ը:
3. Հաստոցի սեղանի մատուցման շարժումները՝ երկայնակի, լայնակի և

-
- ուղղաձիգ տեղաշարժերը ի՞նչ կինեմատիկ շղթաներով են իրականացվում:
4. Ո՞րն է սեղանի, լայնակի սահուկի և բարձակի արագ տեղաշարժման կինեմատիկան:
 5. Գործիքի ամրացման ի՞նչ եղանակներ են օգտագործվում:
 6. 6H12ПБ մակնիշի համապիտանի ֆրեզերային հաստոցի հիմնական հանգույցները և ղեկավարման օրգանները:
 7. Նշել գլխավոր շարժման կինեմատիկ շղթան: Ինչպես են որոշվում իլի ամենամեծ և ամենափոքր պտուտաթվերը՝ $n_{\max}$ -ը և $n_{\min}$ -ը:
 8. Ինչպես են իրականացվում երկայնակի, լայնակի և ուղղաձիգ ուղղությամբ մատուցման շարժումները:
 9. Ինչպես է իրականացվում հաստոցի կիսաավտոմատ աշխատանքային ցիկլը:
 10. Ինչպես է իրականացվում հաստոցի ճոճանակային ցիկլով աշխատանքը:
 11. Նշել ֆրեզերման առանձնահատկությունները:
 12. Թվարկել ֆրեզերման ժամանակ իրականացվող շարժումները:
 13. Ինչ մակերևույթներ կարելի է մշակել ֆրեզերման եղանակով:
 14. Թվարկել ֆրեզների տեսակները, օգտագործման բնագավառները:
 15. Ինչով է պայմանավորված կարծր համաձուլվածքով ֆրեզների մեծ կիրառությունը:
 16. Ինչպես է պատրաստվում ամբողջական և կազմածո կարծր համաձուլվածքով ֆրեզները:
 17. Ինչ հնարավորություն է տալիս կարծր համաձուլվածքով ֆրեզները:
 18. Ինչպես է իրականացվում հաստոցի ցատկային ցիկլով աշխատանքը: